

摘藻堂四庫全書薈要

集部

欽定四庫全書薈要

集部

唐文粹卷十七

上
下

詳校官候選知縣臣吳甸華



欽定四庫全書
會要卷一萬九千八百三十三

集部

唐文粹卷十七上

宋姚鉉編

詩十一

總五十九首

古調歌篇七

寺觀十一

始除尚書郎別善福精舍

韋應物

寄閭防

劉春虛

題鶴林寺

薛據

題破山寺後禪院

常建

琅邪山寺

韋應物

簡寂觀西澗瀑布下作

五老峯贈隱者

姚系

石門墨山有禪堂道觀天下絕境

張說

題思禪寺

獨孤及

仙遊寺有龍潭穴弄玉祠

李華

遊棲霞寺

顧況

廟社四

四皓廟

元稹

魚山神女歌詞二首

王維

古社

元稹

邊塞三

虜患

張陵

代北州老翁答

張謂

遼西

崔顥

畫圖六

王處士草堂壁畫衡霍諸山

劉長卿

題劉相公三湘圖

郎士元

觀于舍人壁畫山水

王季友

題遐上人古松歌

朱灣

畫竹歌

白居易

觀李湊所畫美人障子

劉長卿

古器物五

石鼓歌

韓愈

古劍歌

郭元振

磨鏡篇

劉禹錫

贈友人古鏡

朱晝

團扇歌

劉禹錫

樂器七

彈琴

劉希戩

江上琴興

常建

聽蜀僧彈琴

李白

奉和張舍人閣中直夜思聞雅琴因書事

呂溫

聽彈風入松贈楊補闕

王昌齡

金陵聽韓侍御吹笛

李白

武昌老人說笛歌

劉禹錫

草木十一

題老張松樹

宋之問

古栢行

杜甫

脩竹篇

陳子昂

種竹

元稹

竹徑偶作

推德與

露青竹鞭歌

顧況

暑日題道邊樹

王穀

井上桐

陸龜蒙

石上藤

岑參

兔絲

元稹

春草謠

顧況

禽鳥昆蟲十

王兵馬使二角鷹

杜甫

觀放白鷹

李白

飛鳶操

劉禹錫

百舌吟

鸚鵡詞

蘇軾

鴛鴦篇

陳子昂

子規啼

韋應物

鷓鴣吟

劉禹錫

春蟬

元稹

江上蚊子

韋楚老

道路二

戲題關門

岑參

門前路

陸龜蒙

始除尚書郎別善福精舍

韋應物

簡略非世器委身同草木逍遙精舍居飲水自為足累
日曾一擲對書常懶讀社臘會高年山川恣遊矚明世
方選士中朝懸美祿除書忽到門冠帶便拘束愧忝郎
署迹謬蒙君子錄俯仰垂華纓飄飄翔輕轂行將親愛
別戀此西澗曲遠峯照夕川夏雨生衆綠迅風飄野路
迴首不遑宿明晨下煙闕白雲在幽谷

寄閻防

時在終南山
豐德寺讀書

劉脊虛

青暝南山色君與緇錫隣深路入古寺落花隨暮春紛

紛對寂寞往往落衣巾松色空照水經聲時有人晚心
復南望山遠情獨親應以脩往業亦唯此立身深林度
空夜煙月資清真莫嘆文明日彌年從隱淪

題鶴林寺

薛據

道門隱形勝向背臨法橋松覆山殿冷花藏溪路遙珊
珊寶幡挂燄燄明燈燒遲日半空谷春風連上潮少憑
水木興暫忝身心調願謝携手客茲山禪侶饒

題破山寺後禪院

常建

清晨入古寺初日明高林竹徑通幽處禪房花木深山
光悅鳥性潭影空人心萬籟此都寂但餘鐘磬音

琅邪山寺

韋應物

受命恤人隱茲遊久未忘鳴騶響幽澗前旌耀崇崗青
冥臺砌寒綠縹草木香填壑躋花界疊石構雲房經制
隨巖轉繚繞豈定方新泉洩陰壁高蘿蔭綠塘攀林一
棲心飲水得清涼還歸坐郡閣但見山蒼蒼

簡寂觀西澗瀑布下作

淙流絕壁散虛煙翠澗深巖際松風起飄飄來灑襟窺
蘿玩猿鳥解組傲園林茶菓邀真侶觴酌洽同心曠歲
懷茲賞春行始重尋聊將橫吹笛一寫山水音

五老峯大明觀贈隱者

姚系

雲觀此山北與君携手稀林端涉橫水洞口入斜暉乍
覺鸞鶴邇忽為煙霧飛故人清和客默會琴心微丹術
幸可授青龍當未歸悠悠平生意此日復相違

石門墨山二山相連有禪堂道觀天下絕境

張說

茵輪江上山近在華容縣常陟巴丘首天晴遙可見佳
遊屢前諾芳月愆幽眷及此符守移懽言臨道便既携
賞心客復有送行掾竹徑入陰窅松崖上空蕸草共林
一色雲與峯萬變探窺石門斷緣越沙澗轉兩山勢爭
雄峯巘相顧盼藥妙靈仙寶境華嚴壑選清都西淵絕
金地東敞宴池果接園畦風煙通臺殿高尋去石頂曠
覽天宇徧千山紛滿目百川豁對面騎來雲氣迎人去

鳥聲戀長揖桃源士舉世同企羨

題思禪寺上方

獨孤及

溪口聞法鼓停橈登翠屏攀雲到金界合掌開禪局鬱
律衆山抱空濛花雨零老僧指香樓云是不死亭眇眇
千越路茫茫春草青遠山噴百谷繚繞馳東溟目極想
何在境照心亦冥駭然諸根空破結如破瓶下視三界
狹但聞五濁腥山中有良藥吾欲墮天形

仙遊寺有龍潭穴弄玉祠

李華

捨事入樵逕雲木深谷口萬壑移晦明千峯轉前後疑
然龍潭上石勢若奔走開圻秋天光崩騰夏雷吼靈溪
自茲去紆直互紛糾聽聲靜復喧望色無更有冥冥翠
微下高殿映杉柳滴滴洞穴中懸泉響相扣昔時秦王
女羽化年代久日暮松風來簫聲生左右早窺神仙籙
願結芝朮友安得羨門方青囊繫吾肘

遊棲霞寺

顧況

棲霞山中子規鳥口邊血出啼不了山僧後夜初入定

聞似不聞山月曉

四皓廟

元稹

巢由昔避世堯舜不得臣伊呂雖急病湯武乃可君四
賢胡為者千載名氛氲顯晦有遺跡前後疑不倫秦政
虐天下黷武窮生民諸侯戰必死壯士眉亦顰張良韓
孺子推碎屬車輪遂令英雄意日夜思報秦先生相將
去不復嬰世塵雲卷在孤岫龍潛為小鱗秦皇轉無道
諫者鼎鑊親茅焦脫衣諫先生無一言趙高殺二世先

生如不聞劉項取天下先生遊白雲海內八年戰先生
全一身漢業日已定先生名亦振不得為濟世宜哉為
隱淪如何一朝起屈作儲貳賓安存孝惠帝推賴戚夫
人捨大以謀細虬盤而蠖伸惠帝竟不嗣呂氏禍有因
雖懷安劉志未若周與陳皆落子房術先生道何屯出
處貴明白故吾今有云

魚山神女歌詞二首

王維

迎神

坎坎擊鼓魚山之下吹洞簫望極浦
女巫進紛屢舞陳
瑶席湛清醕風淒淒兮夜雨神之來兮不來使我心兮
苦復苦

送神

紛進拜兮堂前目眷眷兮瓊筵來不語兮音容不傳作暮
雨兮愁空山悲急管思繁絃靈芝駕儼欲旋倏雲收兮
雨歇山青青兮水潺潺

古社

元稹

古社基址在人散社不神唯有空心樹妖狐藏魅人狐
惑意顛倒臊腥不復聞丘墳變城郭花草仍荆榛良田
千萬頃占作天荒田主人議芟斫怪見不敢前那言空
山燒夜隨風馬奔飛聲鼓輦震高焰旗幟翻逡巡荆棘
盡狐兎無子孫狐死魅人滅煙消壇墠存繞壇舊田地
給授有等倫農收村落盛社樹新團圓社公千萬歲永
保村中民

虜患

張陵

今日漢家探使回
蟻疊胡兵來未歇
春風渭水不敢流
摠作六軍心上血

代北州老翁答

張謂

負薪老翁住北州
北望鄉關生客愁
自言老翁有三子
兩人已向黃沙死
如今小男新長成
明年聞道更徵兵
定知此別必零落
不及相隨同死生
盡將田宅借鄰伍
且復伶俜去鄉土
在生本求多子孫
及有誰知更辛苦
近傳天子尊武臣
強兵直欲靜胡塵
安邊自合有長策

何必流離中國人

遼西

崔顥

燕郊芳歲晚殘雪凍邊城四月春草合遼陽春水生胡
人正牧馬漢將日徵兵露重寶刀濕沙虛金鼓鳴寒衣
著已盡春服誰與成寄語洛陽使為傳邊塞情

王處士草堂壁畫衡霍諸山

劉長卿

愛此衡霍近卷簾如可攀能令堂上客見盡湘南山青
翠千萬狀飛來方丈間歸雲無處減去鳥何時還勝事

日相對主人常獨閒
清陰滿四壁佳氣生重闕
頗與宿心會看看慰愁顏

題劉相公三湘圖

郎士元

昔別醉衡霍爾來憶南州
今朝平津邸魚得瀟湘遊
稍辨荆門樹依然芳杜洲
微明三巴峽咫尺萬里流
去鳥不知倦遠帆生暮愁
涔陽指天末北渚空悠悠
枕上見漁父座中常狎鷗
誰言魏闕下自有東山幽

觀于舍人壁畫山水

王季友

野人宿在人家少朝見此山謂山曉半壁仍棲嶺上雲
開簾放出湖中鳥獨坐長松是阿誰再三招手起來遲
于公大笑向予說小弟丹青能爾為

題遐上人院壁畫古松歌

朱灣

石上盤古根謂言天生朽安知草木性變在畫師手陰
深方丈間真趣幽且閒木文離披勢搓捽中裂空心火
燒出掃成三寸五寸枝便作千年萬年物莓苔濃淡意
不同一半死皮藏蠹蟲風霜未必來到此氣色杳似寒

山中孤標可翫不可取能使支公道場古

畫竹歌

并序

白居易

協律郎蕭悅善畫竹舉世無倫蕭亦甚自秘重有終歲
求其一竿一枝而不得者知予好事忽寫一十五竿惠
然見投予厚其意高其藝無以荅貺作歌以報之凡一
百八十六字歌曰

植物之中竹難寫古今雖畫無似者蕭郎下筆獨逼真
丹青已來唯一人一人畫竹身肥擁腫蕭畫葉瘦節節疎

人盡竹梢死羸垂蕭盡枝活葉葉動不根而生從意生
不苟而成由筆成野塘水邊碕岸側森森兩叢十五莖
嬋娟不失筠粉態蕭索盡得風煙情舉頭忽見不似畫
低眉靜聽疑有聲西叢七莖勁而健省向天竺寺前石
上見東叢八莖疎且寒憶曾湘妃廟裏雨中看幽姿遠
思少人別與君相顧空長嘆蕭郎蕭郎老可惜手戰眼
昏頭雪色自言便是絕筆時從今此竹尤難得

觀李湊所畫美人障子

劉長卿

愛爾含天姿丹青有殊智無間已得象象外更生意西
子不可見千秋無重還空憐浣紗態猶在含毫間一笑
豈易得雙蛾如有情牕風不舉袖但覺羅衣輕華堂翠
幕春風來內閣金屏曙色開此中一見亂人目只疑行
到雲陽臺

石鼓歌

韓愈

張生手持石鼓文勸我試作石鼓歌少陵無人謫仙死
才薄將奈石鼓何周網陵遲四海沸宣王憤起揮天戈

大開明堂受朝賀諸侯劔珮鳴相磨蒐于岐陽騁雄俊
萬里禽獸皆遮羅鐫功勒成告萬世鑿石作鼓隳嵯峨
從臣才藝咸第一揀選撰刻留山阿雨淋日炙野火燎
鬼物守護煩撓訶公從何處得紙本毫髮盡備無差訛
詞嚴義密讀難曉字體不類隸與蝌年深豈免有缺畫
快劔所斷生蛟鼉鸞翔鳳翥衆仙下珊瑚碧樹交枝柯
金繩鐵索鎖紐壯古鼎躍水騰龍拔陋儒編詩不收入
二雅褊迫無委蛇孔子西行不到秦掎摭星宿遺義娥

嗟予好古生苦晚對此涕淚雙滂沱憶昔初蒙博士徵
其年始改稱元和故人從軍在右輔為我量度掘白科
濯冠沐浴告祭酒如此至寶存豈多氈包席裏可立致
十鼓只載數駱駝薦諸太廟比部鼎光價豈止百倍過
聖恩若許留太學諸生講解得切磋觀經鴻都尚填咽
坐見舉國來奔波剗苔剔蘚露節角安置妥帖平不頗
大廈深簷與蓋覆經歷久遠期無他中朝大官老於事
詎肯感激徒嬖倖要牧童敲火牛礪角誰復著手為摩挲

日消月燦就埋沒六年西顧空吟哦義之俗書趨姿媚
數紙尚可博白鵝繼周八代爭戰罷無人收拾理則那
方今太平日無事柄任儒術崇丘軻安能以此上論列
願借辨口如懸河石鼓之歌止於此嗚呼吾意其蹉跎

古劍歌

郭元振

君不見昆吾鐵冶飛炎煙紅光紫氣俱赫然良工鍛鍊
凡幾年鑄得寶劍名龍泉龍泉顏色如霜雪良工嗟
歎奇絕琉璃玉匣吐蓮花錯鏤金環生明月正逢天下

無風塵幸得用防君子身精光黯黯青蛇色文章片片
綠龜鱗非直結交遊俠子亦曾親近英雄人何言中路
遭棄捐零落飄淪古獄邊雖復沉埋無所用猶能夜夜
氣衝天

磨鏡篇

劉禹錫

流塵翳明鏡歲久看如漆門前負局生為我一磨拂萍
開綠池滿暈盡金波溢白日照空心圓光走幽室山神
袂氣沮野魅真形出却思未磨時瓦礫來唐突

贈友人古鏡

朱晝

我有古時鏡初自壞陵得蛟龍猶泥蟠魑魅幸月蝕磨
久見菱葉青於藍水色贈君將照心無使心受惑

團扇歌

劉禹錫

團扇復團扇奉君清暑殿秋風入庭樹從此不相見上
有乘鸞女蒼蒼網蟲遍明月入懷袖別是機中練

彈琴

劉希戩

碧山本岑寂素琴何清幽彈為風入松崖谷颯以秋庭

鶴舞白雪泉魚躍洪流余欲娛世人明月難暗投感嘆
未終曲淚下不可收嗚呼鍾子期零落歸山丘死而若
有知魂兮從我遊

江上琴興

常建

江上調玉琴一絃清一心泠泠七絃變萬木澄幽陰能
使江月白又令江水深始知梧桐枝可以徽黃金

聽蜀僧濬彈琴

李白

蜀僧抱綠綺西上峨眉峯為我一揮手如聽萬壑松客

心洗流水餘響入霜鐘不覺碧山暮秋雲暗幾重

奉和張舍人閣中直夜思聞雅琴因書事

呂溫

迢遞天上直寂寞丘中琴憶爾山水韻起予仁智心凝
情在正始超想踈煩襟涼生子夜後月照禁垣深遠風
藹蘭氣微露清桐陰方襲緇衣慶永奉南薰吟

聽彈風入松贈楊補闕

王昌齡

商風入我絃夜竹深有露絃悲與林寂清景不可度寒

落幽居心颺颺青松樹松風吹草白溪水寒日暮聲意
去復還九變待一顧空山多雨雪獨立君始悟

金陵聽韓侍御吹笛

李白

韓公吹玉笛個儻流玉音風吹繞鍾山萬壑皆龍吟王
子停鳳管師襄掩瑤琴餘響渡江去天涯安可尋

武昌老人說笛歌

劉禹錫

武昌老人七十餘手把庾令相聞書自言年少學吹笛
早事曹王曾賞激往年征鎮戍蘄州楚山蕭蕭笛竹秋

當時買材恣搜索典却身上烏貂裘古苔蒼蒼封老節
石上孤生飽風雪商聲五音隨指發水中龍應行雲絕
曾將黃鶴樓上吹一聲占盡秋江月如今老去興尤遲
音韻高低耳不知氣力已無心尚在時時一曲夢中吹
題老張松樹

宋之問

歲晚東巖下周顧何悽惻日落西山陰衆草起寒色中
有喬松樹使我長嘆息百尺無寸枝一生自孤直

古栢行

杜甫

孔明廟前有老栢柯如青銅根如石霜皮溜雨四十圍
黛色叅天二千尺君臣已與時際會樹木猶為人愛惜
雲來氣接巫峽長月出寒通雪山白憶昨路遠錦亭東
先主武侯同閔宮崔嵬枝幹郊原古窈窕丹青戶牖空
落落盤踞雖得地冥冥孤高多烈風扶持自是神明力
正直元因造化功大厦如傾要梁棟萬牛迴首丘山重
不露文章世已驚未辭翦伐誰能送苦心豈免容螻蟻
香葉曾經宿鸞鳳志人幽士莫怨嗟古來才大難為用

與東方左史脩竹篇

并序

陳子昂

東方公足下文章道弊五百年矣漢魏風骨晉宋莫傳
然而文獻有可徵者僕嘗暇時觀齊梁間詩彩麗競繁
而興寄都絕每以永嘆竊思古人常恐逶迤頹靡風雅
不作以耿耿也一昨於解三處見明公詠孤桐篇骨氣
端翔音情頓挫光英朗練有金石聲遂用洗心飾視發
揮幽鬱不圖正始之音復覩於茲可使建安作者相視
而笑解君云張茂先何敬祖東方生與其比肩僕亦以

為知言也故感嘆雅製作脩竹詩一篇當有知音以傳
示之

龍種生南岳孤翠鬱亭亭峯頂上崇翠煙雨下微冥夜
聞鼃鼠呌晝聒泉聲春風正淡蕩白露已清泠哀響
激金奏密色滋玉英歲寒霜雪苦含彩獨青青豈不厭
凝冽羞比春木榮春木有盈歇此節無凋零始願比金
石終古保堅貞不意伶倫子吹之學鳳鳴遂偶雲龢瑟
張樂奏天庭妙曲方千變簫韶已九成信蒙雕斲美常

願事僊靈驅馳翠虬駕伊鬱紫鸞笙結交靦臺女吟弄
昇天行攜手登白日遠遊戲赤城低昂元鶴舞斷續彩
雲生永隨衆仙去三山遊玉京

種竹

并序

元稹

昔樂天贈余詩云無波古井水有節秋竹竿余秋來種
竹廳下因而有懷聊書十韻

昔公憐我直比之秋竹竿秋來苦相憶種竹廳前看失
地顏色改傷根枝葉殘清風猶淅淅高節空團團鳴蟬

眈莫景跳蛙築幽欄塵土復晝夜稍雲良獨難丹丘信
云遠安得臨仙壇漳江冬草綠何人驚歲寒可憐亭亭
餘一一青琅玕孤鳳竟不至坐傷時節闌

竹逕偶作

權德輿

退朝此休沐閉戶無塵氛支策入幽逕清風隨此君琴
觴恣偃傲蘭蕙相葢蓋幽賞方自適林西煙景曛

露青竹鞭歌

顧況

鮮于仲通正當年章仇兼瓊在蜀川約束蜀兒採馬鞭

蜀兒採鞭不敢眠橫截斜飛飛鳥邊繩橋夜上層崖顛
頭挿白雲跨飛泉採得馬鞭長且堅浮漚丁子珠聯聯
仄煮蠟指光爛然章仇魚瓊持上天上天雨露何其偏
飛龍閑廐馬數千朝飲吳江夕秣燕紅塵撲轡汗濕韉
師子麒麟聊比肩曲江昆明洗刷牽四蹄踏浪頭栞天
蛟龍稽顙河伯虔拓羯胡鷄脚手鮮陳閔韓幹丹青妍
欲貌未貌眼欲穿金鞍玉勒錦連乾騎入桃花楊柳烟
十二樓中奏管絃樓中美人奪神仙爭愛大家把此鞭

祿山入關關破年忽見揚州北邸前
祗有人還千一錢
亭亭筆直無皺節磨將形相一條鐵
市頭格是無人別
江海賤臣不拘綆垂鞘挂影西窓缺
稚子覓衣挑仰穴
家僮拾薪幾拗折玉潤猶霑玉壘雪
碧鮮似添養弘血
蜀帝祠邊子規咽相如橋上文君絕
往來策馬降至尊
七盤九折橫劔門穆王八駿超崑崙
安用冉冉孤生根
聖人不貴難得貨金玉珊瑚誰買恩

暑日題道邊樹

王穀

火輪迸焰燒長空浮埃撲面愁濛濛
羸僮走馬喘不進忽逢碧樹含清風
清風留我移時住滿地濃陰懶前去
却嘆人無及物功不似團團道邊樹

井上桐

陸龜蒙

美人傷別離汲井常待曉愁因轆轤轉
驚起雙棲鳥獨立傍銀牀碧桐風嫋嫋

石上藤

岑參

石上生孤藤弱蔓依石長不逢高枝引
未得凌空上何

處堪託身為君長萬丈

兔絲

元稹

人生莫依倚依倚事不成君看兔絲蔓依倚榛與荆荆
榛易蒙密百鳥撩亂鳴下有狐兔穴奔走亦縱橫樵童
斫將去柔蔓與之并翳薈生可恥束縛死無名桂樹月
中出珊瑚石上生俊鶻渡海食應龍昇天行靈物本特
達不復相纏縈纏縈竟何者荊棘與飛莖

春草謠

顧況

春草不解行隨人上東城正月二月色綿綿千里萬里
傷人情

王兵馬使二角鷹

杜甫

悲臺蕭颭石龍從哀壑杈枒浩呼洶中有萬里之長江
迴風滔日孤光動角鷹翻倒壯士臂將軍玉帳軒翠氣
二鷹猛腦徐侯穉目如愁胡視天地杉雞竹兔不自惜
溪虎野羊俱辟易韝上鋒稜十二翮將軍勇銳與之敵
將軍樹勲起安西崑崙虞泉入馬蹄白羽曾肉三狡獬

敢決豈不與之齊
荆南芮公得將軍
亦如角鷹下翔雲
惡鳥飛飛啄金屋
安得爾輩開其羣
驅出六合衆鸞分
觀放白鷹

李 白

八月邊風高
胡鷹白錦毛
孤飛一片雪
百里見秋毫

飛鳶操

劉禹錫

鳶飛杳杳青雲裏
鳶鳴蕭蕭風四起
旗尾飄揚勢漸高
箭頭剡劃聲相似
長空悠悠霽日懸
六翮不動凝風煙
游鵠翔雁出其下
慶雲清景相迴旋
忽聞饑鳥噪相聚

瞥下雲中爭腐鼠騰音礪吻相喧呼仰天大嚇疑鷓鴣
畏人避犬投高處俛啄無聲猶屢顧青鳥自愛玉山禾
仙禽徒貴華亭露撲檄危巢向暮時毳毼飽腹蹲枯枝
遊童挾彈一麾肘臆碎羽分人不悲天生衆禽各有類
威鳳文章在仁義鷹隼儀形螻蟻心雖能戾天何足貴

百舌吟

曉星寥落春雲低初聞百舌間關啼花枝滿空迷處所
搖動繁英墜紅雨笙簧百轉音韻多黃鸝吞聲燕無語

東方朝日遲遲升迎風弄景如自驚數聲不盡又飛去
何許相逢綠楊路絲蠻宛轉似娛人一心百舌何紛紜
酖顏俠少停歌聽墮珥妖姬和睡聞可憐光景何時盡
誰能低回避鷹隼廷尉張羅自不關潘郎挾彈無情損
天生羽族爾何微舌端萬變乘春暉南方朱鳥一朝見
索漠無言蒿下飛

鸚鵡詞

蘇 郁

莫把金籠閉鸚鵡箇箇分明解人語忽然更向君前語

三十六宮愁幾許

鴛鴦篇

陳子昂

飛飛鴛鴦鳥舉翼相蔽虧俱來綠潭裏共向白雲涯音
容相眷戀羽翮兩逶迤蘋萍戲春渚霜霰遠寒池浦沙
連岸淨汀樹拂潭垂年年此遊翫歲歲來追隨鳳凰起
丹穴獨向梧桐枝鴻鴈來紫塞空憶稻梁施烏啼倦依
託鶴鳴傷別離豈若此雙禽翻飛不異林刷羽清江浦
交頸紫山岑文章負奇色和鳴多好音聞有鴛鴦綺復

有鴛鴦衾持為美人贈勗此故交心

子規啼

韋應物

高林滴露夏夜清南山子規啼一聲鄰家孀婦抱兒泣
我獨展轉何為情

鷓鴣吟

劉禹錫

朝陽有鳴鳳不聞千萬祀鷓鴣催衆芳畏聞先入耳秋
風白露晞從是爾啼時如何上春日唧唧滿庭飛

春蟬

元稹

我自東歸日厭苦春鳴聲作詩憐化工不遣春蟬生及
來商山道山深氣不平春秋兩相似虫豸百種鳴風松
不成韻蜩蟬沸如羹豈無朝陽鳳羞與微物爭安得天
上雨奔渾河漢傾蕩滌反時氣然後好晴明

江上蚊子

韋楚老

搖狹翅亞紅腹江邊夜起如雲哭請問貪婪一點心腐
肉填腹幾多足越女如花住江曲寒娥夜夜凝雙綠任
君撩亂錦窓中十幅輕綃圍夜玉

戲題關門

岑參

來亦一布衣去亦一布衣
羞見關城吏還從舊路歸

門前路

陸龜蒙

門前向城路一直復一曲
曲去日中還直行日暮宿何
必日中還曲塗荆棘間

唐文粹卷十七上

欽定四庫全書薈要卷一萬九千八百三十四

集部

唐文粹卷十七下

宋姚鉉編

詩十二

總五十六首

古調歌篇八

月明河四

月生句

劉猛

把酒問月

李白

月蝕詩

盧仝

明河篇

宋之問

風雨露雪六

賀雨詩

白居易

洛陽清明日雨霽

李正封

詠露

山雪

釋皎然

秋風引

劉禹錫

竹牕聞風寄苗發司空曙

李益

江海泉水十

觀海

獨孤及

西陵口觀海

薛據

題玉潭

獨孤及

及第後過揚子江

施肩吾

責漢水詞

李善夷

迎潮送潮詞二首

陸龜蒙

引泉詩

賦得三峽流泉歌

李季蘭

明冰篇

富嘉謨

宮禁七

殿前曲

王昌齡

西施篇

王維

三閣詞四首

劉禹錫

霓裳羽衣曲

李肱

神仙二十九

遊仙詩十六首

道士吳筠

上元夫人詩

李白

王子喬

宋之問

玉真仙人詞

李白

夢太白西峯

常建

苦篁調笑引

李賀

少室山韋鍊師昇仙歌

皇甫冉

宿青牛谷梁鍊師仙居

楊衡

玄都壇歌

杜甫

寄全椒山中道士

韋應物

洗心

道士司馬退之

齋心

王昌齡

寄菖蒲

張籍

金璫玉佩歌

顧況

月生句

劉猛

月生十五前日望光彩圓月滿十五後日畏光彩瘦不

見夜花色一樽成暗酒匣中苔背銅光短不遍空不惜
補明月慙無此良工

把酒問月

故人賈淳
令余問之

李白

青天有月來幾時我今停盃一問之人攀明月不可得
月行却與人相隨皎如飛鏡臨丹闕綠煙滅盡清輝發
但見宵從海上來寧知曉向雲間沒白兔搗藥秋復春
姮娥孤棲誰與鄰今人不見古時月今月曾經照古人
古人今人若流水共看明月皆如此唯願當歌對酒時

月光長照金樽裏

月蝕詩

盧仝

新天子即位五年歲次庚寅斗柄插子律調黃鍾森森
萬木夜殭立寒氣顛肩頑無風爛銀盤從海底出出來
照我草屋東天色紺滑凝不流冰光交貫寒瞳矐初疑
白蓮花浮出龍王宮八月十五夜比並不可雙此時怪
事發有物吞食來輪中輪如壯士斧斫壞柱似雪山風
拉摧百鍊鏡照見膽平地理寒灰火龍珠飛出腦却入

蚌蛤胎槌環破壁眼看盡當天一搭如煤炷磨蹤滅跡
須臾間便似萬古不可開不料至神物有此大狼狽星
如撒沙出爭頭事光大奴婢炷燈看拵烏感切葵如玳瑁

今夜吐燄如長虹孔隙千道射戶外玉川子涕泗下中
庭獨自行念此日月者太陰太陽精皇天要識物日月
乃化生走天汲汲勞四體與天作眼行光明此眼不自
保天公行道何由行吾見陰陽家有說望日蝕月月光
滅朔月掩日日光缺兩眼不相攻此說吾不容又孔子

師老子云五色令人目盲吾恐天似人好色則喪明幸
且非春時萬物不嬌榮青山破瓦色綠水冰崢嶸花枯
無女艷鳥死沉歌聲頑冬何所好偏使一目盲又聞古
老說蝕月蝦蟇精徑圓千里入汝腹如此癡騃阿誰生
可從海窟來便解緣青冥恐是睚眦間指塞所化成黃
帝有二目帝舜重瞳明二帝懸四目四海生光輝吾不
遇二帝滉漭不可知何故瞳子上坐使蟲豸欺長嗟白
兔搗靈藥恰似有意防姦非藥成滿臼不中度委任白

兔夫何為憶昔堯為天十日燒九州金爍水銀流玉燭
丹砂焦六合烘為窯堯心增百憂天見堯心憂勃然發
怒決洪流立擬沃殺九日妖天高日走沃不及但見萬
國赤子臍臍生魚頭此時九御導九日爭持節幡麾幢
旒駕車六九五十四頭蛟螭虬掣電九火輶汝若蝕開
齟齬輪御轡執索相爬鉤推蕩輶渴入汝喉紅鱗燄鳥
燒口快翎鬣倒側聲酸鄒撐腸拄肚礪礪如山丘自可
飽死更不偷不獨填饑坑亦解堯心憂恨汝時當食埋

頭擻腦不肯食不當食張唇哆嘴食不休食天之眼養
逆命安得上帝請汝劉嗚呼人養虎被虎齧天媚墓被
墓瞎乃知恩非類一一自作孽吾見患眼人必索良工
訣想天不異人愛眼固應一安得常娥氏來習扁鵲術
手操春喉戈去此睛上物初既猶朦朧既久如抹漆但
恐功業成便此不吐出玉川子又涕泗下心禱再拜額
搗沙土中地上蟣虱臣今告訴帝天皇臣心有鐵一寸
可剗妖墓癡腸皇天不為臣立梯磴臣血肉身無由飛

上天揚天光封詞付與小心風飈排闥闖入紫宮密邇
玉几前劈拆奏上臣仝頑愚冒敢死橫干天甚長東方
蒼龍角挿戟尾捍風當心開明堂統領三百六十鱗蟲
坐治東方宮月蝕不救援安用東方龍南方火鳥赤滌
血項長尾短飛跋刺頭戴井冠高達拊月蝕鳥宮十二
度鳥為居停主人不覺察貪向何人家行赤口毒舌毒
蟲頭上喫却月不啄殺虛貶鬼眼赤突音扶窩鳥罪不可
雪西方攫虎立拊拊音几斧為牙鑿為齒偷犧牲食封豕

大墓一巒固當軟美見似不見是何道理爪牙根天不
念天天若准擬錯准擬北方寒龜被蛇縛藏頭入殼如
入獄蛇筋束緊束破殼寒龜夏鼈一種味且當臠其肉
一底板沒信處唯堪支牀脚不中鑽灼與天下卜歲星
主福德官爵奉董秦忍使黔婁生覆尸無衣巾天失眠
不弔歲星胡其仁榮惑雙鑠公執法大不中月明無罪
過不糾蝕月蝨年年十月朝太微支盧謫罰何災凶土
星與土性相背反養福德生禍害到人頭上死破敗今

夜月蝕安可會大白真將軍怒激鋒鏑生恒州陣斬酈
定進項骨脆甚春蔓菁天唯兩眼失一眼將軍何處行
天兵辰星任廷尉天律自主持人命在盆底固應樂見
天盲時天若不肯信試喚臯陶鬼一問而今三台文章
宮作上天紀綱環天二十八宿磊落尚書郎整頓排班
行劒握他人將一四太陽側一四天市旁操斧代大匠
兩手不怕傷弧矢引滿反射人天狼呀啄明煌煌癡牛
與駮女不肯勤農桑徒勞含淫思旦夕遙相望蚩尤簸

旗弄旬朔始搥天鼓鳴璫琅枉矢龍蛇行眉目森森張天
狗下舐地血流何滂滂譎險萬萬黨構架何可當眯目
豐成就害我光明王請留北斗一星相北極指揮萬國
懸中央此外盡拂除堆積如山罔贖我父母光當時恒
星沒殞雨如迸漿似天會事發叱喝誅姦狂何故中道
廢自遺今日殃善善又惡惡郭公所以亡願天神聖心
無信他人忠玉川子詞訖風色緊格格近月黑暗邊有
似動劒戟須臾癡墓精兩吻自決圻初露半个壁漸吐

滿輪魄衆星盡原赦一墓獨誅磔腹肚忽脫落依舊挂
穹碧光彩未蘇來慘淡一片白奈何萬里光受此吞吐
厄再得見天眼感荷天地力或問王川子孔子修春秋
二百四十年月蝕盡不收今子吐吐詞頗合孔意不王
川子笑荅或請聽逗遛孔子父母魯諱魯不諱周書外
書大惡故月蝕不見收余命唐天口食唐土唐禮過三
唐樂過五小猶不說大不可數災沴無有小大瘡安引
衰周研覈可否日分晝月分夜辨寒暑一主刑一主德

政乃舉孰為人面上一目偏可去願天完兩目照下萬
方土更不瞽萬萬古

明河篇

宋之問

八月涼風天氣晶萬里無雲河漢明昏見南樓清且淺
曉落西山縱復橫洛陽城闕天中起長河夜夜千門裏
複道連甍共蔽虧畫堂瓊戶特相宜雲母帳前初汎濫
水精簾外轉逶迤倬彼昭回如練白復出東城接南陌
南陌征人去不歸誰家今夜擣寒衣駕爲機上踈螢度

烏鵲橋邊一鴈飛，鴈飛螢度愁難歇。
坐見明河漸微沒，已能舒卷任浮雲。
不惜光輝讓流月，明河可望不可親。
願得乘槎一問津，更將織女支機石，還訪成都賣卜人。

賀雨詩

白居易

皇帝嗣寶歷，元和三年冬。自冬及春暮，不雨旱燄燄。
上心念下民，懼歲成災凶。遂下罪己詔，殷勤告萬邦。
帝曰：予一人繼天承祖宗，憂勤不遑寧。夙夜心忉忉，元年誅
劉闢。一舉靖巴邛，二年戮李錡。不戰安江東，顧惟眇眇。

德遠有巍巍功或者天降沴無乃儆予躬上思答天戒
下思致時邕莫如率其身慈和與儉恭乃命罷進獻乃
命賑饑窮宥死降五刑責已寬三農宮女出宣徽廐馬
減飛龍庶政靡不舉皆出自宸衷奔騰道路人偃耒田
野翁懽呼相告報感泣涕霑眉順人人心悅先天天意
從詔下纔七日和氣生沖融凝為油油雲散作習習風
晝夜三日雨淒淒復濛濛萬心春熙熙百穀青芃芃人
變愁為喜歲易儉為豐乃知王者心憂樂與衆同皇天

及后土所感無不通冠珮何鏘鏘將相及王公蹈舞呼
萬歲列賀明庭中小臣誠愚陋職忝金鑾宮稽首再三
拜一言獻天聰君以明為聖臣以直為忠敢賀有其始
亦願有其終

洛陽清明日雨霽

李正封

曉日清明天夜來
嵩少雨千門尚煙火
九陌無塵土
酒醕河橋春漏閒
宮殿午遊人戀芳草
半犯嚴城鼓

詠露

霏霏靈液重雲表無聲落霑樹急元蟬灑池淒皓鶴流
塵清遠陌飛月澄高閣宵潤玉堂簾曙寒金井索佳人
比珠淚坐感紅綃薄

山雪

釋皎然

夕陽在西峯疊翠縈殘雪狂風卷絮迴驚猿攀玉折何
意山中人誤報山花發

秋風引

劉禹錫

何處秋風至蕭蕭送鴈羣今朝入庭樹孤客最先聞

竹窓聞風寄苗發司空曙

李益

微風驚暮坐臨牖思悠哉開門復動竹疑是故人來時
滴枝上露稍霑階下苔幸當一入幌為拂綠琴埃

觀海

獨孤及

北登渤海島回首秦東門誰尸造物功鑿此天池源瀕
洞吞百谷周流無四垠廓然混茫際望見天地根白日
自中吐扶桑如可捫迢遙蓬萊峯想像金臺存秦帝昔
經此登臨異飛翻揚旌百神會望日羣山奔徐福竟何

金
卷十七下
成美門徒空言唯見石橋足千年潮水痕

西陵口觀海

薛據

浙江漫湯湯近海勢彌廣在昔胚混凝融為百川長地
形失端倪天色潛滉漾東南際萬里極目遠無象山影
乍浮沉潮波忽來往孤帆或不見棹歌猶響像日暮長
風起客心空振蕩浦口霞未收潭心月初上林嶼幾遑
迴亭臯時偃仰歲晏訪蓬瀛真遊非外獎

題玉潭

獨孤及

碧玉徒強名冰壺難比德唯當寂照心可並滄淪色

及第後過揚子江

施肩吾

憶昔將貢年抱愁此江邊魚龍互閃爍黑浪高於天今
日步春草復來經此道江神也世情為我風色好

責漢水辭

并序

李善夷

春秋僖公四年齊桓公合諸侯之師盟于召陵責楚之
苞茅不入問昭王南征而不復楚子使屈完對曰貢之
不入寡君之罪也敢不供給昭王南征之不復君其問

諸水濱按昭王南征至漢舟人膠其舟王遂溺死杜預
曰當時漢水未屬楚杜之注其為謬哉且楚實殷之始
封楚苦縣瀨鄉在漢水東北六百餘里則漢水於西周
之際豈未屬楚乎又詩云捷彼殷武奮伐荆楚采入其
阻哀荆之旅鄭玄注云深入方城之阻也方城今在漢
水北三百里豈昭王時未屬楚乎屈完以齊桓所問之
大不敢他對但請自問於水濱之人言我不之知也漢
實屬楚久矣夫山林川澤天子祀之必有其神楚人膠

其舩而禍其君神不能福神之罪也余過漢見其波濤
汎濫而責其水詞曰

漢之廣兮風波四起雖有風波不如蹄涔之水蹄涔之
水不爲下國而傾天子漢之深兮其隄莫量雖云莫量
不如行潦之汪行潦之汪不爲下國而溺天王漢之美
者曰魴吾雖饑不食其魴恐汚吾之饑腸

迎潮送潮詞二首

并序

陸龜蒙

余耕稼所在松江南旁田廬門外有溝通浦溆而朝夕

之潮至焉天弗雨則輒而留之用以滌濯灌漑及物之
功甚鉅其羸壯遲速繫望晦盈虛也用之則順而進捨
之則默以退有類乎君子之道翫而感之作迎潮送潮
詞二首聊寄聲於騷人之末

江霜嚴兮楓葉丹潮聲高兮墟落寒鷗巢卑兮漁箔短
遠岸沒兮光爛爛潮之德兮無際既充其大兮又充其
細密幽人兮欸柴門寂寞流連兮依稀舊痕濡餘澤搗
兮潮之恩不尸其功兮歸于混元

右迎潮

潮西來兮又東下日染中流兮紅灑灑汀葭蒼兮水蓼
枯風騷牢兮愁煙孤大幾望兮微將翳晦搜瀛溶兮斂
然而退愛長波兮數數一幅巾兮無纓可濯帆生塵兮
棹有衣悵潮之還兮吾猶未歸

右送潮

引泉詩

睦州龍興觀
老君院作

上嗣位六載吾宗刺桐川余來拜旌戟詔下之明年是

時春三月繞郭花蟬聯嵐盤百萬髻上插黃金鈿授以
道士館置榻于東偏滿院聲碧樹空堂形老仙本性樂
凝淡及來更虛玄焚香禮真像盥手披靈編新安山角
角烏龍獨巉然

烏龍山名

除非淨晴日不見蒼崖巔上有挈

雲峯下有噴壑泉泉分數十汊落處皆崢嶸寒聲入爛
醉聒破西窓眠支筇起獨尋祇在墻東邊呼僮具畚鍤
立鑿莓苔穿濃淙一派墮練帶橫斜牽亂石拋落落寒
流響濺濺狂怒七里瀨縮到踈楹前跳光潑半散湧沫

飛旋圓勢束三峽挂瀉危孤磴懸曾聞瑤池溜亦灌朱
草田鳧伯弄翠葉鸞鵠舞丹煙凌風振桂拖隔霧馳犀
船況當玄元家嘗著道德篇上善可比水斯文叅五千
精靈若在此肯惡微波傳不擬爭滴瀝還應會淪漣出
門後飛箭合勢浮青天必有學真子鹿冠秋鶴顏如能
輔余志日使䟽其源

賦得三峽流泉歌

李季蘭

妾家本住巫山雲巫山流水常自聞玉琴奏出轉寥曠

直似當時夢中聽三峽迢迢幾千里一時流入幽閨裏
巨石崩崖指下生飛波遠浪弦中起初疑噴怒含雷風
復似嗚咽流不通迴湍曲瀨意將盡時復滴瀝平沙中
憶昔阮公為此曲能使仲容聽不足一彈既畢還一彈
願比流泉鎮相續

明冰篇

富嘉謨

北陸蒼茫河海凝南山闌干晝夜冰素彩峩峩明月升
深山窮谷不自見安知採斲備嘉薦陰房固沍掩寒扇

陽春二月朝始暾春光潭沲度千門明冰時出御至尊
彤庭赫赫九儀備胥王煌煌千官事明冰畢歲周在位
憶昔沙朔寒風漲崑崙長河冰始壯漫汗峻嶒積亭障
邕邕鳴鴈江上來禁苑池臺冰復開搖春涵綠映樓臺
幽歌七月王風始明冰藏用昭物軌四時不忒千萬祀

殿前曲

王昌齡

貴人粧梳殿前催香風吹入殿後來仗引笙歌大宛馬
白蓮花發照池臺

西施篇

王維

豔色天下重西施寧久微朝為越溪女暮作吳宮妃賤
日豈殊衆貴來方悟稀邀人傳香粉不自著羅衣君寵
益嬌態君憐無是非當時浣紗伴莫得同車歸寄謝鄰
家子效顰安可希

三閣詞

吳音四首

劉禹錫

貴人三閣上日晏未梳頭不應有恨事嬌甚卻成愁
珠箔曲瓊鉤子細見揚州北兵那得渡浪語聲悠悠

沉香帖閣柱金縷畫門楣迴首降幡下已見黍離離
三人出胷井一身登檻車朱門謾臨水不得見鱸魚

霓裳羽衣曲

李肱

開元太平日萬國賀豐歲梨園厭舊曲玉座流新製鳳
管遞參差霞衣競搖曳宴罷水殿空輦餘春草細蓬壺
事已久仙樂功無替詎肯聽遺音聖明知善繼

遊仙十六首

道士吳筠

啓冊觀往載搖懷考今情終古已寂寂舉世何營營悟

彼衆仙妙超然含至精凝神契沖玄化服凌太清心同
宇宙廣體合雲霞輕翔風吹羽蓋慶霄拂霓旌龍駕朝
紫微後天保令名豈如寰中士軒冕矜暫榮

鸞鳳棲瑤林鵬鶚集平楚飲啄本殊好翱翔終異所吾
方遺諠囂立節慕高舉解茲區中戀結彼霄外侶誰謂
天路遐感通自無阻

慙俗從遷謝尋仙去淪沒三元有真人與我生道骨凌
晨吸丹景入夜飲黃月百關彌調暢方寸益清越棲神

合虛無洞覽周恍惚不覺隨玉皇焚香詣金闕

西龜初定錄東華已校名三官無遺譴七祖昇雲輶體
妙塵累隔心微玄化并一朝出天地億載猶童叟使我
齊浩劫蕭蕭宴玉清

怡神在靈府皎皎含清澄仙經不吾欺輕舉信有徵疇
昔希道念而今果天矜豈非陰功著乃致白日昇焉用
過洞府吾其越朱陵

高真誠寥邈道合不我遺孰謂姑射遠神人可同嬉結

駕從之遊飄飄出天垂不理人自化神凝物無疵因知
至精感足以和四時

八海廣無際三山高不極金臺羅中天羽客忘遊息霞
液朝可飲虹芝晚堪食嘯歌自忘心騰舉寧假翼保壽
同三光安能幾千億

將過太帝宮暫詣扶桑處真童已相迓為我清宿霧海
若寧洪濤義和止奔馭五雲結層閣八景動飛輿青霞
正可挹丹樞時一遇留我宴玉堂歸軒不令遽

欲趨洞陽界試覽丹極表赤帝躍火龍炎官控朱鳥導
我昇絳府長驅出天杪陽靈赫重暉四達何皎皎為爾
流飄風羣生遂無天

予因詣金母飛蓋超西極遂入素中天停輪太濛側若
華拂流影不使白日匿傾曦復亭午六合無暝色道化
隨感遷此理誰能測

九龍何蜿蜿載我昇雲綱臨睨懷舊國風塵混蒼茫依
依遠人寰去去邇帝鄉上超星辰紀下視日月光倏已

過太微天居煥煌煌

停驂太儀側整服金闕前肅肅承上帝鏘鏘會羣仙鴻
鑪發靈香廣廡張鈞天玉醴洽中座霞膏充四筵良期
無終極俛仰移億年

峻朗妙門闕澄微真鑒通瓊林九霄上金閣三天中飛
蚪躍慶雲翔鶴搏靈風鬱彼玉京會仙期六合同

予昇至陽源欲憇明霞館飄飄瓊輪舉曄曄金景散結
虛成萬有高妙咸可翫玉山鬱嵯峨琅海杳無岸覽賞

過千椿遐齡誰復算

招攜紫陽友合宴玉清臺排景羽衣振浮空雲駕來靈
旂七曜動瓊障九光開鳳舞龍璫奏蚪軒殊未迴

高昇紫極上宴此玄都岑玉蕊散奇香瓊珂流雅音靈
風生太漠習習吹人襟體混希微廣神凝空洞深蕭然
宇宙外自得乾坤心

上元夫人詩

李白

上元誰夫人偏得王母嬌嵯峨三角髻餘髮散垂腰素

披青色錦身著赤霜袍手提羸女兒閒與鳳吹簫眉語
兩自笑忽然隨風飄

王子喬

宋之問

王子喬愛神仙七月七日上賓天白虎搖瑟鳳吹笙乘
騎雲氣喻日精喻日精長不歸遺廟今在而人非空望
山頭草草露濕君衣

玉真仙人詞

李白

玉真之真人時往太華峯清晨鳴天鼓飈歛騰雙龍弄

霓不輟手行雲本無蹤幾時人少廣王母應相逢

夢太白西峯

常建

夢寐昇九崖杳靄逢元君遺我太白峯寥寥辭垢氛結
宇在星漢宴林閉氛氲簷楹覆餘翠巾鳥生片雲時往
溪谷間孤亭晝仍曛松風引天影石瀨清霞文恬目緩
舟趣霽心投鳥羣春風又搖擢潭島花紛紛

苦篁調笑引

李賀

請說軒轅在時事伶倫采竹二十四伶倫采之自崑丘

軒轅以之調元氣當時黃帝上天時二十三管咸相隨
唯留一管人間吹無德不能得此管此管沉埋虞舜祠

少室山韋鍊師昇仙歌

皇甫冉

紅霞紫氣甚氤氲絳節青童迎少君忽從林下昇天去
空使時人禮白雲

宿青牛谷梁鍊師仙居

楊衡

隨雲步入青牛谷青牛道士留我宿可憐夜久月明中
唯有壇邊一枝竹

玄都壇歌寄元逸人

杜甫

故人昔隱東蒙峯，已佩含景蒼精龍。
故人今居子午谷，獨在陰崖結茅屋。
屋前太古玄都壇，青石漠漠松風寒。
子規夜啼山竹裂，王母晝下雲旗翻。
知君此計誠長往，芝草琅玕日應長。
鐵鎖高垂不可攀，致身福地何蕭爽。
寄全椒山中道士

韋應物

今朝郡齋冷，忽念山中客。
澗底東荆薪，歸來煮白石。
欲持一瓢酒，遠慰風雨夕。
落葉遍空山，何處尋行跡。

洗心

道士司馬退之

不踐名利道始覺塵土腥不味稻粱食始覺神骨清羅
浮奔走外日月無短明山瘦松亦勁鶴老飛更輕逍遙
此中客翠髮皆長生草木多古色雞犬無新聲君有出
俗志不貪英雄名傲然脫冠帶改換人間情去矣丹霄
步向曉雲冥冥

齊心

王昌齡

女蘿覆石壁溪水幽濛朧紫萼蔓黃花娟娟寒露中朝

飲花上露夜卧松下風雲英化為水光彩與我同日月
蕩精魂寥寥天府空

寄菖蒲

張籍

石上生菖蒲一寸十二節仙人勸我食令我頭青面如
雪逢人寄君一絳囊書中不得傳此方君能來作棲霞
侶與君同入丹玄鄉

金璫玉珮歌

顧況

贈君金璫太霄之玉珮金鎖禹步之流珠五嶽真君之

秘籙九天丈人之寶書東井沐浴辰已畢先進洞房上
奔日借問君從何處來黃姑織女機邊出

唐文粹卷十七下



總校官庶吉士臣張能照

校對官庶吉士臣翟槐

謄錄監生臣李華文

欽定四庫全書薈要

集部
唐文粹卷十八

詳校官候選知縣臣吳甸華



欽定四庫全書蒼要卷一萬九千八百三十五

集部

唐文粹卷十八

宋姚鉉編

詩十三

總一百三十六首

古調歌篇九

感寓五十

感寓詩三十八首

陳子昂

感寓七首

張九齡

感寓

權德輿



效陳拾遺感寓二首

司空圖

古意二首

孫邵

詠史二十一

詠史十一首

李華

詠史一首

高適

詠史二首

釋皎然

詠史二首

劉禹錫

詠史四首

盧照鄰

讀李斯傳

曹鄴

慨嘆三十五

出關作

魏徵

隴右途中遭非語

貞半千

書懷

劉幽求

自紀

皇甫松

贈友人

呂溫

贈韓愈二首

孟郊

贈喬林

劉春虛

寄唐生

白居易

華下

司空圖

傷時二首

孟雲卿

封丘作

高適

街西居三首

姚合

效陳拾遺子昂

司空圖

感時

夜坐

張說

無可奈何歌

白居易

逢白公

元稹

感懷

費冠卿

贈崔純亮

孟郊

客喜

賈島

有所思

宋之問

秦人謠

古之奇

金
卷十八
時興

揚賁

聞砧有感

呂溫

野田行

于鵠

贈馮宿

李觀

偶然作二首

呂溫

及第後荅潼關主人

朝饑

賈島

九日酬顧少府

高適

感物十六

觀玉篇

陳子昂

素絲

陸龜蒙

李都尉古劍

白居易

廢琴

廢瑟詞

張籍

說劍

元稹

春桂問答二首

王績

養鷺詞

劉禹錫

對菊

賈島

直鉤吟

盧仝

競渡

元稹

見牧牛人擔青草歸

張說

道州觀野火

呂溫

諭寶二首

元稹

春感八

送春曲三首

劉禹錫

衡州春早二首

呂溫

尋人偶題

邵真

題花樹

楊衡

惜花

陸龜蒙

秋感六

秋日

耿漳

秋夕懷遠

孟郊

蟋蟀詩

羅隱

秋思

司空圖

在郡秋懷二首

張九齡

感寓詩三十八首

陳子昂

微月生西海幽陽始化昇圓光正東滿陰魄已朝凝太
極生天地三元更廢興至精諒斯在三五誰能徵
蘭若生春夏芊蔚何青青幽獨空林色朱蕤冒紫莖遲
遲白日晚嫋嫋秋風生歲華盡搖落芳意竟何成

蒼蒼丁零塞今古緬荒途
亭堠何摧兀暴骨無全軀
黃沙莫南起白日隱西隅
漢甲三十萬曾以事匈奴
但見沙場死誰憐塞上孤

樂羊為魏將食子殉軍功
骨肉且相薄他人安得忠
吾聞山中相乃屬放麕翁
孤獸猶不忍況以奉君終

市人矜巧智於道若童蒙
傾奪相夸侈不知身所終
曷見玄真子觀世玉壺中
杳然遺天地乘化入無窮

吾觀龍變化乃知至陽精
石林何冥密幽洞無留行
古

之得仙道信與元化并玄感非象識誰能測淪冥世人
拘目見酣酒笑丹經崑崙有瑤樹安得采其英

白日每不歸青陽時暮矣茫茫吾何思林卧觀無始衆
芳委時晦鵙鵙悲鳴耳鴻荒古已頽誰識巢居子

吾觀崑崙化日月淪洞冥精魄相交構天壤以羅生仲
尼推太極老聃貴窈冥西方金仙子崇議乃無明空色
皆寂滅業緣定何成名教信紛籍死生俱未停

聖人祕元命懼世亂其真如何嵩公輩詆譎誤時人先

天誠為美階亂禍誰因長城備邊寇嬴禍發其親赤精
既迷漢子年何救秦去去桃李花多言死如麻

深居觀元化怵然爭朶頤羣動相啖食利害紛凝凝便
便夸毗子榮耀更相持務光讓天下商賈競刀錐已矣
行采芝萬世同一時

吾愛鬼谷子青谿無垢氛囊括經世道遺身在白雲七
雄方龍闕天下久無君浮榮不足貴遵養晦時文舒可
彌宇宙卷之不盈分豈徒山水壽空與麋鹿羣

呦呦南山鹿離畧以媒和招搖青桂樹幽靈亦成科世
情甘近習榮耀紛如何怨憎未相復親愛生禍羅瑤臺
傾巧笑玉杯殞雙蛾誰見孤城樹青青成斧柯

林居病時久水木澹孤清閒卧觀物化悠悠念無生青
春始萌達朱火已滿盈殂落方自此感歎何時平

臨岐泣世道天命良悠悠昔日殷王子玉馬遂朝周寶
鼎淪伊穀瑤臺成故丘西山傷遺老東陵有故侯

貴人難得意賞愛在須臾莫以心如玉採他明月珠昔

稱天桃子今為春市徒鴟鴞悲東國麋鹿泣姑蘇誰見
鴟夷子扁舟去五湖

聖人去已久公道緬良難蚩蚩夸毗子堯禹以為謾驕
榮貴工巧勢利遞相干燕王尊樂毅分國願同歡魯連
讓齊爵遺組去邯鄲伊人信往矣感激為誰歎

幽居觀大運悠悠念羣生終古代興沒豪聖莫能爭三
季淪周赧七雄滅秦嬴復聞赤精子提劍入咸京炎光
既無象晉虜復縱橫堯禹道已昧昏虐勢方行豈無當

世雄天道與胡兵吐吐安可言時醉而未醒仲尼溺東
夏伯陽遁西溟大運自古來旅人胡歎哉

逶迤世已久骨鯁道斯窮豈無感激者時俗顧此風灌
園何其鄙皎皎於陵中世道不相容嗟嗟張長公

聖人不利己憂濟在元元黃屋非堯意瑤臺安可論吾
聞西方化清淨道彌敦奈何窮金玉雕刻以為尊雲構
山林盡瑤圖珠翠煩鬼功尚未可人力安能存夸愚適
增累矜智道逾昏

玄天幽且默，羣議曷咄咄。聖人教猶在世，運久陵遲一
繩將何繫？憂醉不能持，去去行采芝。忽為塵所欺，

蜻蛉遊天下，與世本無患。飛飛未能止，黃雀來相干。穰
侯富秦寵金石，比交歡出入咸陽裏。諸侯莫敢言，寧知
山東客。激怒秦王，肝布衣取丞相。千載為辛酸，

微霜知歲晏。斧柯始青青，況乃金天夕。浩露霑羣英，登
山望宇宙。白日已西暝，雲海方蕩潏。孤鱗安得寧，

翡翠巢南海，雄雌珠樹林。何如美人意，驕愛比黃金。殺

身炎洲裏委羽王堂陰旖旎光首飾歲蕤爛錦衾豈不
在遐遠虞羅忽見尋多材信為累歎息此珍禽

挈瓶者誰子妖服當青春三五明月滿盈盈不自珍高
堂委金玉微纓懸千鈞如何負公鼎被奪笑時人

元蟬號白露茲歲已蹉跎羣物從大化孤英將奈何瑤
臺有青鳥遠食玉山禾崑崙見元鳳豈復虞雲羅

荒哉穆天子好與白雲期宮女多怨曠層城閉蛾眉日
耽瑤臺樂豈傷桃李時青苔空萎絕白髮生羅帷

朝發宜都渚浩然思故鄉故鄉不可見但見巫山陽巫
山彩雲沒高丘正微茫佇立望已久涕淚霑衣裳豈茲
越鄉感憶昔楚襄王朝雲無處所荆國亦淪亡

昔日章華宴荆王樂荒淫霓旌翠羽蓋射光雲夢林竭
來高唐觀悵望陽雲岑雄圖今何在黃雀空哀吟

丁亥歲云暮西山事甲兵羸糧市邛道荷戟爭羌城嚴
冬陰風勁窮岫油雲生昏黷無晝夜羽檄復相驚攀跼
兢萬仞崩危遠九冥藉藉峯壑裏哀哀冰雪行聖人御

宇宙聞道太階平肉食謀何失葵藿緬縱橫

可惜瑤臺樹灼灼佳人姿碧華映朱實攀折青春時豈
不盛光寵榮君白玉墀但恨紅芳歇凋傷感所思

竭來豪遊子勢利禍之門如何蘭膏歎感激自生怨衆
趨明所避時棄道猶存雲泉既已失羅網與誰論箕山
有高節湘水有清源唯應白鷗鳥可為洗心言

索居獨幾日炎夏忽然衰陽彩皆陰翳親友盡睽違登
山望不見涕泣久漣漣宿夢感顏色若與白雲期世中

驕豪子驅逐正蚩蚩蜀山與楚水攜手在何時

金鼎合神丹世人將見欺飛飛騎羊子胡乃在蛾眉變
化固非類芳菲能幾時疲疴苦淪世憂悔日侵淄蒼然
顧幽褐白雲空涕洟

朔風吹海樹蕭條邊已秋亭上誰家子哀哀明月樓自
言陰燕客結髮事遠遊赤丸殺公吏白刃報私讐避仇
至海上被役此邊州故鄉三千里遼水復悠悠每憤胡
兵入常為中國羞何知七十載白首未封侯

金
卷十八
本為貴公子平生實愛才感時思報國拔劍起蒿萊西
馳丁零塞北上單于臺登山見千里懷古心悠哉誰言
未忘禍磨沒成塵埃

浩然坐何慕吾蜀有蛾眉念與楚狂子悠悠白雲期時
哉悲不會涕泣久漣漣夢登綏山穴南采巫江芝探元
觀竒化遺世從雲螭婉孌時永矣感悟不見之

朝入雲中郡北望單于臺胡秦何密邇沙朔氣雄哉藉
藉天驕子猖狂已復來塞垣無名將亭堠空崔嵬咄嗟

吾何歎邊人塗草萊

仲尼探元化幽鴻順陽和大運自盈縮春秋遞來過盲
飈忽號怒萬物相紛劇溟海皆震蕩孤鳳其如何

感寓七首

張九齡

蘭葉春葳蕤桂華秋皎潔欣欣此生意自爾為佳節誰
知林棲者聞風坐相悅草木有本心何求美人折
幽林歸獨卧滯慮洗孤清持此謝高鳥因之傳遠情日
夕懷空意人誰感至精飛沉理自隔何所慰吾誠

魚遊樂深池鳥棲欲高枝嗟爾蜉蝣羽薨薨亦何為有
生豈不化所感奚若斯神理日微滅吾心安得知浩歎
楊朱子徒然泣路岐

孤鴻海上來池潢不敢顧側見雙翠鳥巢在三珠樹矯
矯珍木巔得無金丸懼美服患人指高明逼神惡今我
遊冥冥弋者何所慕

吳越數千里夢寐今夕見形骸非我親衾枕即鄉縣化
蝶猶不識川魚安可羨海上有仙山歸期覺神變

抱影吟中夜誰聞此歎息美人適異方庭樹銜幽色白
雲愁不見滄海飛無翼鳳凰一朝來竹花此可食

漢上有游女求思安可得袖中一書札欲寄雙飛翼冥
冥獨不見耿耿徒緘憶紫蘭秀空蹊皓露奪幽色馨香
歲欲晚感歎情何極白雲在南山日暮長太息

感寓

權德輿

殘雨倦歌枕病中時序分秋蟲與秋葉一夜隔窓聞虛
室對搖落晤言無與羣冥心試觀化世故如絲棼但看

鳶戾天豈見山出雲下俚徒擊節朱絃祕南薰倚梧秀
朝陽上有威鳳文終待九成奏來儀瑞吾君

效陳拾遺子昂感寓二首

司空圖

高燕飛何捷啄害恣羣鷄人豈玩其暴華軒容爾居強
欺自天稟剛吐信吾徒乃知不平者矯世道終孤
陽和含煦潤卉木競紛華當為衆所悅私已汝何誇北
里祕穠豔東園鎖名花豪奪乃常理笑君徒咄嗟

古意二首

擬梓州
陳拾遺

孫郈

屈子生楚國七雄知其材介潔世不容跡合藏蒿萊道
廢固命也瓢飲亦賢哉何事葬江魚空使後人哀
魏禮段干木秦王乃止戈小國有其人大國奈之何賢
哲信為美兵甲豈云多君子戰必勝斯言聞孟軻

詠史十一首

李華

日照崑崙上羽人披羽衣乘龍駕雲霧欲往心無違此
山在西北乃是神仙國靈氣皆自然求之不可得何為
漢武帝精意徧羣山糜費巨萬計宮車終不還蒼蒼茂

陵樹足以戒人間

天生忠與義本以佐雍熙何意李司隸而當昏亂時古
墳襄城野斜徑橫秋陂況不禁樵採茅莎無子遺高標
尚可仰精爽今何之一忤中常侍銜冤誰見知常觀黨
錮傳撫卷不勝悲

文侯耽鄭衛一聽一忘餐白雪燕姬舞朱絃趙女彈淫
聲流不返怙蕩日無端獻歲受朝時鳴鐘醺百官兩牀
陳管磬九奏殊未闌對此唯恐卧更能整衣冠

漢皇脩雅樂乘輿臨太學三老與五更天王親割牲一人調風俗萬國和且平單于驟款塞武庫欲銷兵文物此朝盛君臣何穆清至今墳壇下如有簫韶聲

蜀主相諸葛功高名亦尊驅馳十萬衆怒目瞰中原曹伯任公孫國忘身不存社宮久蕪沒白鴈猶飛翻勿言君臣合可以濟黎元為蜀諒不易如曹難復論

秦滅漢帝興南山有遺老危冠揖萬乘幸得厭征討當君逐鹿時臣等已枯槁寧知市朝變但覺泉石好高卧三十

年相看成四皓帝言翁甚善見顧何不早咸稱太子仁重
義亦尊道側聞驪姬事申生不自保蹇出商山雲謁來趨
灑掃東宮成羽翼楚舞傷懷抱後代無其人庾園滿秋草
六國韓最弱末年尤畏秦鄭生為韓計且欲疲秦人利
物可分社原情堪滅身咸陽古城下萬頃稻苗新

昂藏獬豸獸出自太平年亂代乃潛伏縱人為禍愆常
聞斷馬劍每壯朱雲賢身死名不滅塞風吹墓田精靈
如有在幽憤滿松煙

沂水春可涉泮宮映楊葉麗色異人間珊珊搖珮環展禽
恒獨處深巷生禾黍城上飛海雲城中暗春雨適來鳴珮
者復是誰家女泥沾珠綴履雨濕翠毛簪電影閉蓮臉雷
聲飛蕙心自言沂水曲采蘋魚采綠歸逕雖可尋天陰光
景促憐君貞且獨願許君家宿徒勞惜衾枕子不顧雙蛾
豔質誠可重淫風如禮何周王惑褒姒城闕成陂池

巢許在嵩嶺陶唐不得臣九州尚洗耳一命安能親
繇數千祀丘中誰隱淪朝遊公卿府夕是山林人蒲帛

揚側陋薜蘿為搢紳九重念入夢三事思降神且設庭
中燎寧窺泉下鱗

漢時征百越揚僕將樓船幕府功未立江湖已騷然島
夷非敢亂政暴地仍偏得罪因懷壁防身輒控弦三軍
求裂土萬里詎聞天魏闕心猶在旗門首已懸如何得
良吏一為制方圓

詠史一首

高適

尚有綈袍贈應憐范叔寒不知天下士猶作布衣看

詠史二首

釋皎然

田氏門下客馮公衆中賤一朝市義還百代名獨擅始
知下客不可輕能使主人功業成借問高車與珠履何
如庠賤一書生

獨負高世姿冥冥寄浮俗下子去不歸何人識荆王鬻
春意不淺汚跡身豈辱鸞鍬樂述遭蚪蟠甘窟束五噫
謫且正可以見心曲

詠史二首

劉禹錫

驃騎非無勢少卿終不去世道劇頽波我心如砥柱
賈生明王道衛綰工車戲同遇漢文時何人居貴位

詠史四首

盧照鄰

昔有平陵男姓朱名阿游直髮上衝冠壯氣橫三秋願
得斬馬劍先斷佞臣頭天子玉檻折將軍丹血流捐生
不肯拜視死其若休歸來教鄉里童蒙遠相求弟子數
百人散在十二州三公不敢吏五鹿何能誚名與日月
懸義與天壤儔何必疲執戟區區在封侯偉哉曠達士

知命固不憂

季生昔未達身辱功不成髡鉗為臺隸灌園變姓名幸
逢滕將軍魚遇曹丘生漢祖廣招納一朝拜公卿百金
孰云重一諾良匪輕廷議斬樊噲羣公寂無聲處身孤
且直遭時坦而平丈夫當如此唯唯何足榮

大漢昔云季小人道遂振玉帛委閭尹斧鑕嬰搢紳邈
哉郭先生卷舒得其真雍容謝朝廷譚笑獎人倫在晦
不絕俗處亂不為親諸侯不得友天子不得臣沖情甄

負甌重價折角巾悠悠天下士相送洛橋津誰知仙舟
上寂寂無四鄰

公業負奇志交結盡才雄良田四百頃所食常不充一
為侍御史慷慨說何公何公何為敗吾謀適不同仲穎
恣殘忍廢興良在躬死人如亂麻天子如轉蓬干戈及
黃屋荆棘生紫宮鄭生運其謀將以清國戎時來命不
遂脫身歸山東凜凜千載下穆然懷清風

讀李斯傳

曹鄴

欺暗常不然欺明當自戮難將一人手掩得天下目

出關作

魏徵

中原初逐鹿投筆事戎軒縱橫計不就慷慨志猶存杖
策謁天子驅馬出關門請纓繫南越憑軾下東蕃鬱紆
陟高岫出沒望平原古木吟寒鳥空山啼夜猿既傷千
里目還驚久逝魂豈不憚艱險深懷國士恩季布無二
諾侯嬴重一言人生感意氣功名誰復論

隴右途中遭非語

貞半千

趙有兩毛遂魯聞二曾參慈母猶且惑況在行路心冠冕無醜士賄賂成知己名利我所無清濁誰見理弊服空庭春緩帶不著身出遊非懷璧何憂乎忌人正須自保愛振衣在生塵

書懷

劉幽求

心為明時盡君門尚不容田園迷徑路歸去欲何從

自紀

皇甫松

皇天后地力使我向此生貴賤不我均若為天地情我

家世道德旨意匡文明家集四百卷獨立天地經寄言
青松姿豈羨朱槿榮昭昭大化光共此遺芳馨

贈友人

呂溫

南山雙喬松擢本皆千尋夕流膏露津朝被青雲陰負
雪出深澗搖風倚高岑明堂久不構雲榦何森森匠意
方雕巧時情正誇淫生材會有用天地豈無心

贈韓愈二首

孟郊

何以定交契贈君高山石何以保貞妍贈君青松色貧

交過此外無可相彩飾更有其鼠詩吟之堪淚滴其鼠
既穿墉又齧機上絲穿墉有閒土齧機無餘絲朝吟枯
桑柘暮泣空杼機豈是無巧妙絲斷將何施衆人尚肥
華志士多饑羸願君保此節天意當察微

前日遠別離今日生白髮欲知萬里情曉卧半牀月常
恐百蟲秋使我芳草歇

贈喬林

劉春虛

去年上策不見收今年寄食仍淹留美君有酒能便醉

羨君無錢能不憂如今五侯不待客羨君不問五侯宅
如今七貴方自尊羨君不過七貴門丈夫會應有知己
世上悠悠何足論

寄唐生

白居易

賈誼哭時事阮籍哭路岐唐生今亦哭異代同其悲唐
生者何人五十寒且饑不悲口無食不悲身無衣所悲
忠與義悲甚則哭之太尉擊賊日

段太尉以笏擊朱泚

尚書叱盜

時

顏尚書叱李希烈

大夫死兇寇

陸大夫為亂兵所害

諫議謫蠻夷

楊諫議左

金
卷十八
遷道

每見如此事聲發涕輒隨往往聞其風俗士猶或

非憐君頭半白其志竟不衰我亦君之徒鬱鬱何所為
不能發聲哭轉作樂府詩篇篇無空文句句必盡規切
過虞人箴痛甚騷人詞非求宮律高不務文字奇惟歌
生民病願得天子知未得天子知甘受時人嗤藥良氣
味苦琴淡音聲希不懼權豪怒亦任親朋譏人竟無奈
何呼作狂男兒每逢羣動息或遇雲霧披但自高聲歌
庶幾天聽卑歌哭雖異名所感則同歸寄君三十章與

君為哭詞

華下

司空圖

日炙旱雲裂迸為千道血
天地沸一鑊竟自烹妖孽
堯湯遇災數災數還中輟
何事奸與邪古來難撲滅

傷時二首

孟雲卿

徘徊宋郊上不見平生親
獨立正傷心悲風來孟津
大方載羣物生死有常倫
虎豹不相食哀哉人食人
豈知逢世運天道亮云云

太虛流素月三五何皎明光曜侵白日賢愚迷至精四
時有變化天道有虧盈常恐今已沒須臾復更生

封丘作

高適

我本漁樵孟諸野一生自是悠悠者乍可狂歌草澤中
寧堪作吏風塵下祇言小邑無所為公門百事皆有期
拜迎官長心欲碎鞭撻黎庶令人悲悲來向家問妻子
本家盡道今如此生事應須南畝田世情付與東流水
夢想舊山安在哉為銜君命且遲迴乃知梅福徒為爾

卻憶陶潛歸去來

街西居三首

姚合

受得山野性任成多事違青山在宅南迴首東西睺淺
淺一井泉數家共汲之獨我惡水濁鑿井庭之陲自鑿
還自飲亦為衆所非吁嗟世間事潔身誠難為

日出窮巷喜溫然勝重衣重衣豈不暖暖氣人不齊兀
兀復行行不離階與墀

丈夫非馬蹄安得知路岐窮賤飧茹薄興與養性宜乃

知長生術豪貴難得之

效陳拾遺子昂

司空圖

醜婦競簪花花多映愈醜鄰女恃其姿掇之不盈手量
已苟自私招損乃誰咎寵祿既非安於吾竟何有

感時

好鳥無惡聲仁獸肯狂噬寧教鸚鵡啞不遣麒麟細人
語與默唯觀利與勢愛毀亦自遭掩謗終失計

夜坐

張說

懷哉四壁時未有五都價
百金誰見許斗酒難為贖
落花生芳春孤月皎清夜
復逢利交客題戶遙相謝

無可奈何歌

白居易

無可奈何兮白日走而朱顏頽
少日往兮老日催生者
不住兮死者不迴況乎寵辱
豐頽之外物又何常不一
去而一來去不可挽兮來
不可推無可奈何兮已焉哉
惟天長而地久前無始兮
後無終嗟吾生之幾何寄
瞬息乎其中又如太倉之稊
米委一粒於萬鍾何不與道

逍遙委化從容縱心放志洩洩融融胡為乎分愛惡於
生死繫憂喜於窮通倔強其骨髓齟齬其心胃合冰炭
以交戰祗自苦乎厥躬彼造物者云何不為此與化者
云何不隨或煦或吹或盛或衰雖千變與萬化委一順
以貫之為彼何非為此何是誰冥此心夢蝶之子何禍
非福何吉非凶誰達此觀喪馬之翁俾吾為秋毫之杪
吾亦自足不見其小俾吾為泰山之阿吾亦無餘不見
其多是以達人靜則昭然與陰合迹動則浩然與陽同

波委順而已孰知其他時耶命耶吾其無奈彼何委邪
順邪彼亦無奈吾何夫兩無可奈何然後能冥至順而
合大和故吾所以飲大和扣至順而為無可奈何之歌

逢白公

元稹

遠路事無限相逢唯一言月色照榮辱長安千萬門

感懷

費冠卿

螢燭不為苦求名始辛酸上國無交親請謁多少難九
月風割面羞汗成冰片求名俟公道名與公道遠力盡

得一名他喜我且輕家書十年絕歸去知誰榮馬嘶渭
河柳特地起愁聲

贈崔純亮

孟郊

食齋腸亦苦強歌聲無歡出門即有礙誰謂天地寬有
礙非遐方長安大道傍小人智慮險平地生太行鏡破
不改光蘭死不改香始知君子交久久道益彰君心與
我懷離別俱惘惶譬如浸藥泉流苦日已長忍泣目易
衰忍憂形易傷項籍豈非壯賈生豈非良當其失意時

涕泗各滿裳古人勸加食此食難自強一飯九祝噎一
嗟十斷腸況非兒女冤冤氣凌彼蒼彼蒼若有知白日
下清霜今朝始驚呼碧落空茫茫

客喜

賈島

客喜非實喜客悲非實悲百迴信到家未當身一歸未
歸長愁嗟愁嗟填中懷開口吐愁聲還卻入耳來嘗恐
滴淚多自損兩目輝鬢邊雖有絲不堪織寒衣

有所思

宋之問

洛陽城東桃李花飛來飛去落誰家幽閨兒女惜顏色
坐見落花長歎息今年花落顏色改明年花開復誰在
已見松柏摧為薪更聞桑田變成海古人無復洛城東
今人還對落花風年年歲歲花相似歲歲年年人不同
寄言全盛紅顏子須憐半死白頭翁此翁白頭真可憐
伊昔紅顏美少年公子王孫芳樹下清歌妙舞落花前
光祿池臺文錦繡將軍樓閣畫神仙一朝卧病無相識
三春行樂在誰邊婉轉蛾眉能幾時須臾鶴髮亂如絲

但看古來歌舞地唯有黃昏鳥雀飛

秦人謠

古之奇

微生祖龍代卻思堯舜道何人仕帝庭拔殺指佞草姦
臣弄民柄天子恣衷抱上下一相蒙馬鹿遂顛倒中國
既板蕩骨肉安可保人生貴年壽吾恨死不早

時興

楊貴

貴人昔未貴咸願顧寒微及自登樞要何曾問布衣平
明登紫閣日晏下彤闈擾擾路傍子無勞歌是非

聞礪有感

呂溫

千門儼雲端此地富羅紈秋月三五夜礪聲滿長安幽
人感中懷靜聽淚汎瀾所恨搗衣者不知天下寒

野田行

于鵠

日沒出古城野田何茫茫寒孤上孤冢鬼火燒白楊昔
人未為泉下客若到此中還斷腸

贈馮宿

李觀

寒晨上秦原遊子衣飄飄黑雲截萬里獵火從中燒陰

空蒸長煙殺氣獨不銷
冰交石可裂風疾山如搖
時無青松心顧我獨不凋

偶然作二首

呂溫

棲棲復汲汲忽覺年四十
今朝滿衣淚不是傷春泣
中夜兀然坐無言空涕洟
丈夫志氣事兒女安得知
及第後荅潼關主人

本欲雲雨化却隨波浪翻
一霑太常第十過潼關門志
力且虛棄功名誰復論
主人固相問慙笑不能言

朝饑

賈島

市中有樵山此舍朝無煙井底有甘泉釜中乃空然我
要見白日雪來塞青天立聞西牀琴凍折兩三弦饑莫
詣他門古人有拙言

九日訓顧少府

高適

簷前白日應可惜籬下黃花為誰有客子迎霜未授衣
主人得錢肯酤酒蘇秦憔悴時多厭蔡澤棲遲世看醜
縱使登高祗斷腸不如獨坐空搔首

觀玉篇

并序

陳子昂

丙戌歲余從左補闕喬公北征夏四月軍幕舍于張掖
河河洲草木無他異者唯有仙人杖往往叢生幽朔地
寒與中國頗異余家世好服食昔常餌之及此役也而
息意茲味戍人有薦嘉蔬者此物存焉余脩爾而笑曰
始者與此君別不圖至是而見之豈非神明嘉會將欲
扶吾壽也因為喬公昌言其能時東萊王仲烈亦同旅
舍聞而大喜甘心食之已旬有五日矣適有行人自謂

知藥者謂喬公曰此白棘也公何謬哉仲烈愕然而疑亦曰吾怪其味甜今果如此喬公信是言乃譏余作采玉篇謂宋人不識玉而寶珉石也余心知必是猶以獨見之故被奪於衆人乃喟然而嘆曰嗟乎人之大明者目也心之至信者口也夫目照五色口分五味玄黃甘苦亦可斷而不惑矣而路傍一議二子增疑况君臣之間朋友之際乎自是而觀之則萬物之情可見也感采玉詠而作觀玉篇以荅之并示仲烈譏其失真

鴟夷雙白玉此玉有緇磷懸之千金價舉世莫知真丹
青非異色輕重有殊倫勿信玉工言徒悲荆國人

素絲

陸龜蒙

園客麗獨繭詩人吟五總如何墨子淚反以悲途窮我
意豈於是願參天地功為綫補君衮為弦繫君桐左右
修闕職宮商還古風端然潔白心可與神明通

李都尉古劍

白居易

古劍寒黯黯鑄來幾千秋白光納日月紫氣排斗牛有

客借一觀愛之不敢求湛然玉匣中秋水澄不流至寶
有本性精剛無與儔可使寸寸折不能繞指柔願快直
士心將斷佞臣頭不願報小怨夜半刺私讎勸君慎所
用無作神兵羞

廢琴

絲桐合為琴中有太古聲古聲淡無味不稱今人情玉
徽光彩滅朱弦塵土生廢棄來已久遺音尚泠泠不辭
為君彈縱彈人不聽何物使之然羌笛與秦箏

廢瑟詞

張籍

古瑟在匣誰復識
玉柱顛倒朱絲黑
千年曲譜不分明
樂府無人傳正聲
秋蟲暗穿塵作色
腹中不辨工人名
幾時天下復古樂
此瑟還奏雲門曲

說劍

元稹

吾友有寶劍
密之如密友
我實膠漆交
中堂共杯酒
酒酣肝膽露
恨不眼前剖
高唱荊卿歌
亂擊相如缶
更擊復更唱
更酌亦更壽
白虹座上飛
青蛇匣中吼
我聞音

響異疑是干將偶為君再拜言神物可見不君言亦可
見復言我自取迎匣已焚香近鞘先澤手徐抽寸寸刃
漸屈彎彎肘殺殺霜在鋒團團月臨鈕逡巡潛虬躍鬱
律驚左右霆電滿室光蛟龍繞身走我為捧之泣此劍
別來久鑄時堇山破藏在松桂朽幽匣獄邊埋神人水
心守本用稽泥滓果非雷煥有我欲評劍功願君良聽
受劍可剗犀兕劍可切瓊玖劍決天外雲劍衝日中斗
劍隳妖蛇腹劍拂佞臣首太古初斷鼇武王親擊紂燕

丹卷地圖陳平綰花綬曾被挂樹枝寒光射林藪曾經
鑄農器利用翦稂莠神物終變化復為龍北牡晉末武
庫燒脫然排戶牖為欲掃羣胡散作彌天帚自茲失所
往豪英共為詬今復誰人鑄挺然千載後既非古風胡
無乃近鴟九自我與君遊平生益自負况擎寶劍出重
以雄心扣此劍何太奇此心何太厚勸君慎所用所用
無或苟潛將辟魑魅勿但防妾婦留斬泓下蛟莫試街
中狗君今困泥滓我亦空塵垢俗耳驚大言逢人少開

口

春桂問荅二首

王績

問春桂桃李正芬華年光隨處滿何事獨無花
春桂荅春華詎能久風霜搖落時獨秀君知不

養鷺詞

并序

劉禹錫

途逢少年志在逐獸方呼鷹隼以襲飛走因縱觀之卒
無所獲行人有常從事於斯者曰夫鷺禽饑則為用今
哺之過篤故然也予感之作養鷺詞

養鷺非玩形所資擊鮮力少年昧其理日日哺不息探
鷄網黃口旦暮有餘食寧知下韝時翅重飛不得培塿
止林表狡兔自南北飲啄既已盈安能勞羽翼

對菊

賈島

九日不出門十日見黃菊灼灼尚繁英美人無消息

直鉤吟

盧仝

初歲學釣魚自謂魚易得三十持釣竿一魚釣不得人
鉤曲我鉤直哀哉我鉤又無食文王已沒不復生直鉤

之道何時行

競渡

元稹

吾觀競舟子因測大競源天地昔將競蓬勃晝夜昏龍
蛇相噴薄海岱俱崩奔羣動皆攪撓化作流渾渾數極
關心息太和蒸混元一氣忽為二矗然畫乾坤日月復
照耀春秋遞寒溫八荒坦以曠萬物羅亦繁聖人中間
立理世了不煩延繇復幾歲逮及義與軒炎皇熾如炭
蚩尤扇其燭有熊競心起驅戰山林樊一戰波委焰再

戰火燎原戰訖天下定號之為軒轅自是豈無競瑣細
不復言其次有龍競競渡龍之門龍門浚如瀉淙射不
可援赤鱗化時至塘突鬐鬣掀乘風瞥然去萬里黃河
翻接瞬電熒出微吟霹靂喧傍瞻曠宇宙俯瞰卑崑崙
庶類咸在下九霄行易捫倏辭蛙黽穴遽排天帝閣迴
悲暴鰓者未免鯨鯢吞帝命澤諸夏不棄蟲與昆隨時
布膏露稱物施厚恩草木霑我潤豚魚望我蕃嚮來同
競輩豈料由我存壯哉龍競渡一競身獨尊捨此皆蟻

鬪競舟何足論

冬日見牧牛人擔青草歸

張說

塞上繇應折江南草可結欲持梅嶺花遠競榆關雪日
月無他照山川何頓別苟齊兩地心問天將安設

道州觀野火

呂溫

南風吹烈火焰焰燒楚澤陽景當晝連陰天半夜赤過
處若彗掃來時如電激豈復辨蕭蘭焉得分玉石蟲蛇
盡燂爛虎兕亦奔迫積穢一蕩除和氣始融液堯時既

敬授禹稼斯肇迹遍生合穎禾大秀兩岐麥家有京坻
詠人無溝壑感乃悟焚如功來歲終受益

諭寶二首

元稹

沉玉在弱泥泥弱玉易沉扶桑寒日薄不照萬丈心安
得潛淵虯拔壑超鄧林泥封泰山趾水散旱天霖洗此
泥下玉照曜臺殿深刻為傳國寶神氣人不侵

水置白玉壺始見清皎潔珠穿殷紅縷始見明洞澈
鎔無人淬兩刃幽壤鐵秦鏡無人拭一片埋霧月驥跼

環堵中骨附筋入節虬蟠尺澤內魚貫蛙同穴餘鯢無
巨海浮桴矜濺滴棟梁無廣廈顛倒卧霜雪大鵬無長
空舉翮受羈紲豫章無厚地危抵真飢餓圭璧無卞和
甘與頑石列舜禹無陶堯名隨腐草滅神功伏神物神
物神乃別神人不世出所以神功絕神物豈徒然用之
有施設禹功九州理舜德天下悅堯充傳國爾圭用祈
泰折千尋豫章榦九萬大鵬歇棟梁庇生民餘鯢濟來
哲虬騰旱天雨驥騁流電掣手鏡懸姦膽露劒拂妖蛇裂

珠生照乘光冰瑩環座熱此物比在泥斯言為誰發于
今盡凡耳不為君不說

送春曲三首

劉禹錫

春向晚春晚思悠哉風雲日已故花葉自相摧漠漠空
中去何時天際來

春已暮苒苒如人老映葉見殘花連天是青草可憐桃
與李從此同桑棗

春竟去此去何時迴遊人千萬恨落日上高臺寂寞繁

華盡流鶯歸不來

衡州早春二首

呂溫

碧水何逶迤東風吹沙草煙波千里曲不辨嵩陽道
病肺不飲酒傷心不看花唯驚望鄉處猶自隔長沙

尋人偶題

邵真

日昃不復午落花難歸樹人生能幾何莫厭相逢遇

題花樹

楊衡

都無看花意偶到樹邊來可憐枝上色一一為愁開

惜花

陸龜蒙

人壽期滿百花開
唯一春其間風雨至
旦夕旋為塵
若使花解愁
愁於看花人

秋日

耿漳

返照入閭巷
憂來與誰語
古道無人行
秋風動禾黍

秋夕懷遠

孟郊

卧冷無遠夢
聽秋酸別情
高枝低枝風
千葉萬葉聲
淺井不供飲
瘦田長廢耕
今交非古交
貧語聞皆輕

蟋蟀詩

羅隱

頑颺斃芳吹愁夕長屑成有動歌離弔夢如訴如言緒
引虛寬周隙伺榻繁咽夤緣范睡蟬老冠峨綏好不冠
不綏爾奚以悲蚊蚋有毒食人肌肉蒼蠅多端黑白偷
安爾也出處物兮莫累壞舍啼衰虛堂泣署勿徇諠譁
鼠豈無牙勿學萋菲垣亦有耳危條槁飛抽恨唧唧別
帳釭冷柔魂不定美人在何夜影流波與子佇立徘徊
思多

秋思

司空圖

身病時亦危逢秋多慟哭風波一搖蕩天地幾翻覆孤
螢出荒池落葉穿破屋勢利長草草何人訪幽獨

在郡秋懷二首

張九齡

秋風入前林蕭颺鳴寒枝寂寞遊子思寤歎何人知宦
成名不立志在歲已馳五十而無聞古人深所疵平生
去外飾直道如不羈未得操割效忽復寒暑移物情有
固然身退毀亦隨悠悠滄江渚望望白雲涯露下霜且

降澤中草披離蘭艾若不分安用馨香為

庭蕪生白露歲候感遐心策蹇慙遠塗巢枝思故林小
人恐致寇終日如臨深魚鳥好自逸池籠安所欽挂冠

都門採薇南山岑議道誠愧昔覽分還愜今憮然憂
空爾白頭吟

唐文粹卷十八



總校官庶吉士

臣張能照

校對官庶吉士

臣翟槐

謄錄監生

臣李華文

謄錄監生

臣胡容全